


# Der RegiChor wird 40!

Mir wette euch gärn öppis brichte  
über üse Chor chli dichte



Chum zum gloube aber wahr  
der Regi-Chor gits scho 40 Jahr

Drum loufe mir im Umzug mit  
wills üs scho 40ig Jahr lang git

Will mer gärn ir Musig schwelge  
si mer alli Liederhelde

Heldehaft singt üse Chor  
Es isch e Freud für Seel und Ohr

Mir düe Harmonie asträbe  
doch mängisch geit e Ton dernäbe

S isch sicher wahr u ohni z scherze  
duet d Dirigäntin ne usmerze

Si ghört aus – potz Million  
si findet jede fautsche Ton

Mir singe international  
weli Sprach – das isch egal

AfroAngloFranSpanItalo  
sogar Rumantsch isch scho vorcho

Mir lose gäng guet ufenang  
bi Gospelsongs u Kirchehsang

Bi Schlager u bi Mundarthits  
Ohrwürmer sowie Klassik gits

Gärn darfs mal afrikanisch sy  
bisch z nächste Mal du ou derby?

Das isch Schwung und Rhythmus pur  
i säg ders du wirsch stuune nur

Für jede Gschmack öppis derby  
chum cho luege chum verby

Muesch cho lose – s isch der Wahn  
engelhaft singt der Sopran

Di zwöiti Frouestimm sing alt  
das git e guete Bode halt

U richtig schön tönt eim im Ohr  
die höchi Männerstimm, Tenor

Vom Feinsten, wenn nid 1. Klass  
singt i üsem Chor der Bass

Ou fürenand düe mir gärn singe  
es Geburtstagsständli bringe

O d Kulinarik chunnt nid z churz  
ob süess, ob salzig das isch schnurz

Scho mängs feins Ässe hei mer gnosse  
mit em ne feine Schluck begosse

Uf üse Chor jetz es Prosit  
dass ne i 40ig Jahr no git

